

Betico, Libertador di nos País

ORANJESTAD— Awe nos pueblo ta recordá e hecho cu 11 aña pasá a fayecé nos lider/fundador di e partido cu mi tin e honor di guía Movimiento Electoral di Pueblo: en feliz memoria di nos tur Betico Croes.

Estatística berdadero di e pueblo Arubano.

Un gran Arubano, luchador incansabel di e causa nobel di e pueblo manera nos difunto lider en feliz memoria Betico Croes, tabata pa e pueblo.

Poco ta e politiconan den mundo cu Todopoderoso ta manda nan cu un mision pa cumpli cuné a base di nan talentonan special.

Betico tabata un berdadero sirbidor di pueblo.

E pueblo di Aruba desde añanan 40 tabata anhelá un Aruba cu su propio Gobierno den Reino y cu lazonan especial cu Hulanda.

Mas cu un político na Aruba a purba haci algo na e sistema político cu nos pueblo tabata biba den.

Tabata na 1971 cu nos lider stimá den feliz memoria Betico Croes a haya inspiracion pa lanta su propio partido cu metanan di e structura estatal como e principal tópico pa alcanzá y trece un reparticion husto den nos desarroyo económico.

Un partido cu ideología Social Democrática a ser fundá.

Nos lider tabata sa cu pa logra cualkier meta bo mester union di un pueblo sin distincion di raza, region, credo, religion of color político.

El a trece hunto hendenan cu tabata dispuesto pa pone un fin na distincion entre pover y rico, eliminá distincion entre razanan, entre campo y playa, y tur otro cosnan cu tabata separá nos pueblo for di otro.

E sostén mayoritario y e victoria abrumador cu nos Movimiento Electoral di Pueblo a logra na 1973-1975-1977-1977 na dos ocasion y 1982 y 1983 ta muestreman palpabel cu e apoyo tabata casi total.

Eleccion di 1985 tambe Movimiento Electoral di Pueblo a keda e partido mas grandi di Aruba.

Eleccionnan na 1989-1993 y

1994 semper a duna MEP 9 of mas asiento den Parlamento.

Como un gran amante di libertad e ta usa tur su talentonan na disposicion di e pueblo Arubano cu tabata motivá nos pa keda positivo y cu e perseverancia cu nos lo logra nos meta.

Nos pueblo a kre den su sinceridad y den e manera sencillu cu e anda cu su pueblo, pasobra te awe especial esnan cu tin hopi di haber cuné ta admirá y apreciá.

Tur hende por a acudí cerca dje pa cualkier problema of yudanza.

E dedicacion y pasenshi cu e tabatin pa cu su pueblo tabata cosnan excepcional. Durante eleccion di Augustus 1973, sr. Betico Croes en feliz memoria a haci un yamada na su pueblo pa duna su partido e mandato pa bai realizá lo cual otro politiconan Arubano no por a cumpli cuné.

Henter subida político a ser dedicá grandemente na e lucha estatal, principiando cu decentralizacion di poder di Gobierno Central di e isla di Aruba.

E proceso estatal tabata uno hopi complicá y cu hopi decepcionnan na momentonan clave.

Tanto politiconan Antianyo como Hulandes no a tuma e Arubano dinámico y luchador manera nos difunto lider Betico Croes, mucho na serio.

Aki den nos país mes el a ser boycoté pa hendenan cu no kier a comendré su mision.

Nos lider stimá a pasa den hopi bochora, humiyacion na 1977, maltratá pa agentenan policial, cas di su mayornan a ser registrá pa polis, manera na 1978 el a ser encarcelá, 24 April 1983 tirá pa un agente policial na Winstonveld Santa Cruz etc.

Semper nos lider tabata bisa nos cu tur esakinan e mester pasa aden pa pueblo di Aruba por realizá su ideal.

Dene e proceso pa un pueblo Arubano e tabata e motor tras di henter e proceso pa duna pueblo.

Etabata orguyoso di ta un jiu di e terra aki.

Poco ta e dirigentenan político cu por a yega cerca presidentenan di Costa Rica,

Venezuela, Colombia, Santo Domingo etc, sin pasa via e canalnan diplomático.

A bai asina ley cu madre patria Hulanda a pidi su embahadornan den Latino America pa no duna ningun cooperacion na e lider político Arubano.

Semper nos lider tabata bisa cu nos isla ta un territorio cu tin un pueblo di 66 mil hende ta biba riba dje y como pueblo tin e derecho pa den tur libertad determiná su propio destino.

Nos pueblo bao su gufa a lucha pa reconocimiento di e derecho inmanehable di e pueblo, esta esun di autodeterminacion.

Nos tambe mescos cu cualkier nacion tin derecho pa determiná nos propio destino.

Na principio Antianys y Hulanda no kier a duna otro na e causa noble Arubano. Cu e lema "respect" ta exigí di bo contricantenan político, nos a bin logra bala liderazgo di Betico Croes cu tanto Antianys como Hulanda a cumenzá tende nos na 1976.

Como un di poco politiconan Arubano nos lider Betico Croes tabata un di e proménan cu a participá na debatenan político den Parlamento Hulandes na 1978 tratando e tópico di derechonan humano, esta e tratado di New York.

Desde di dia ey nos lider a gana hopi aprecio y simpatía cerca contricantenan político na Hulanda cu a bai asina leu cu Parlamento Hulandes na fin di e debatenan a aprobá Reino y Antianys pa determiná su propio destino.

Como un gran lider y luchador político Betico Croes a habri su portanan cu ainda por tabata será pa e pueblo Arubano.

Nos a bira miembro di e prestigioso organizacion di nos Social Democratanan den e mundo liber y esaki a yuda nos pa pone presion riba Hulanda pa reconocé nos lucha.

Desde 1978 te 1985 Betico Croes tabata vocero di e pueblo aki y specialmente riba plataforma internacional.

Prensa Antianyo y Hulandes na principio no a capta e lucha cu nos lider a hiba: na final a elogiá e bon trabaoan di e gran estadística Arubano.

Mundo henter a reconocé e gran laboran di nos difunto lider na bienestar di e colectividad Arubano.

Nos lider a percurá pa 1-1-1986 Aruba bira un país liber den Reino cu su propio Parlamento, Consejo di Ministernan, Gobernador etc.

Un país cu su propio Parlamento, Consejo di Ministernan, Gobernador etc.

Un país cu su propio constitucion y institucionnan manera Algemene Rekenkamer, Sociaal Economische Raad y Raad van Advies.

Nunca nos por a biba pensa cu nos lider mes no por a mira local e mes a lucha tanto pé.

Un accidente dia 31 di December 1985 a separé mortalmente pa 11 luna for di nos y dia 26 di November 1986 aña di Status Aparte el a bai laga nos pa semper. Awor nos pueblo a bai recordá 11 aña di su fayecimento.

Su bon trabaoan y logronan grandi t'ey pa un y tur mira, apesar cu último tres aña nos a conocé falsificacion di nos historia dor di Gabinete Eman.

Apesar cu Gobierno di Aruba no tabata kier pa el a haya e reconocimiento cu e merecé, nos pueblo y nos partido hamas lalubidá, Gabinete Eman a haci tur cos pa e ser negligishá.

Nos lo keda recordé hunto cu su famia cu a pasa hunto cuné den e temponan bon y malo.

Betico Croes en feliz memoria tabata e inspirador die causa noble y husto di e pueblo Arubano.

Cu nos tur por bati riba nos pecho canta nos Himno, hiza nos bandera y grita sin miedo biba Aruba, ta danki na su gran inspiracion y Todopoderoso a duné.

Den e dianan aki mas cu nunca pueblo ta recordá Betico Croes, ora nan mira cu e Gobierno AVP/OLA ta entregando tur dia nos autonomia.

Ta un hecho cu pueblo no por confia AVP, cu nos structura estatal.

Promé ta nos seguridad nacional, despues guardacosta, extradicion, casinonan, banconan, zona franca y por último e rapport De Ruyter.

Ata nos awor cu rapport destastoso di Algemene Rekenkamer.

Ta un berguenza nacional cu continuamente e gobernantenan actual ta bao di investigacion.

Ta un gran cantidad di rapport tin trahá contra nan caba.

Rapportnan manera A. Koerten riba Seguridad Nacional, Rapport di Zona Franca, casino y banconan, Rapport van Lennep, Rapport de Ruyter, y di Algemene Rekenkamer.

A ser negligishá esnan cu berdaderamente a lucha pa nos autonomia.

Tur rapportnan cu a ser trahá ta concluí cu Gabinete Eman ta práctica mal gobernacion no ta respetá nos leyman, ta mete den husticia y no ta ser confiá dor di Hulanda y Merca.

E debilidad di Gabinete Eman ta muestre cu Hulanda por a abusá di nos Autonomia.

Esaki sigur ta mal señal pa nos país.

Laga nos riba e dia di awe reflexioná si e Gabinete Eman ta cumpliendo cu su deber di defendé nos autonomia den Reino Hulandes, cumpliendo asina cu e deseo ferviente di nos lider inmortal Betico Croes.

Sigur bo tambe ta yega na e conclusionnan cu tanten e Gobierno debil di Eman ta existí nos autonomia ta na peliger tur dia.

P'esey e eleccion di dia 12 di December próximo nos lo tin e oportunidad único y sagrado pa pone un Gobierno cu lo recobrará e partinan di nos autonomia perdí, lo exigí respet di Hulanda y trece tranquilidad atrobe den nos pueblo y lo goberná na un forma transparente y cu respet pa opinion di un y tur.

Un economía, unda atrobe e comerciante Arubano ta ser respetá.

Nos ta terminá pidiendo Todopoderoso pa iluminá sinti den e gobernantenan a ctual di e país Aruba pa duna respet y honor na un gran Arubano di e talla internacional, manera awe den feliz memoria Betico Croes apesar cu nan a ser mandá cas pa semper.

Lider di fraccion MEP, Nelson Orlando Oduer. □